



DEO OPTIMO MAX.

UNI ET TRINO,

VIRGINI DEI-PARÆ, ET S. LUCE,

Orthodoxorum Medicorum Patrono

BIU Santé  
Médecine  
Paris

QUÆSTIO MEDICO-CHIRURGICA\*.

QUOD LIBETARIIS DISPUTATIONIBUS

*manè discutienda, in Scholis Medicorum, die Jovis quartâ*

*Martii, anni M. DEC. LXXXIV.*

M. MARINO-JACOBO-CLARO ROBERT,

Doctore Medico, Præsîde.

*An Leucophlegmatia, leves Scarificationes?*

I.

**M**ACHINAM humanam format unicum vas multifidum, quod, ut diametro sic & nomine varium. Per ejus ramos, licet sub finem stupendæ tenuitatis, varii generis Fluida, perrenni motu aguntur, tenuantur, secernuntur. Magna, enascens è Corde Arteria, innumeros spargens furculos, ad omnes Corpora

\* Propugnata à Joanne MIDY, M. Elia COL DE VILARS, Præsîde.



partes Sanguinem pellendo vehit, quem excipiunt duplicis speciei vasa; Venæ, scilicet, sanguineæ & Arteriæ lymphaticæ. Has longè numerosiores, promissiores, minores, subit Lympha, sive alba cruoris portio, denegato rubris ipsius globulis, utpotè crassioribus, aditu; qui quidem globuli, urgente Cordis & Arteriarum systole, Venarum radices immediate inire coguntur, Cor iterum petaturi. Lympha verò secretionum omnium materies, Arterias suas emensa, sepositis diversis fecernendis succis, à Venis lymphaticis hauritur, ad Cor itidem deveniendi. Si quæ autem pars, maximè Corporis ambitus lymphaticis vasis scaturit. Cutem intra, & adiposi Corporis cellulas, mirabile horumcè tubulorum rete espatiatur, quod oculis jucundè manifestant injectiones. Quò facilior foret & citior revehendi cruoris ad commune principium regressus, opus erat ipsi occurrere duplex via, quam suppeditant Venæ sanguineæ & lymphaticæ, ne Sanguinis circuitus tardaretur, sed fluxus in Arteriis celeritas, mediantibus utriusque generis Venis, compensaretur. Dùm liberè sit ille Liquidorum circuitus, viget sanitas. Ex illorum inordinatione, nascitur morbus; & sicut à cruoris stasi, Phlogoses, morbi acuti Phlegmone, Erysipelas, ac cæteri tumores inflammatorii; sic & ab impedito Lymphæ cursu, Hydrops, Œdema, Leucophlegmatia. Sub hac Anasarca minus aptè dicta, tumet partium; præsertim inferiorum, universa cutis, albet, emollitur, laxatur; prementis digiti vestigium retinet. Sentim corrumpitur subsistens Liquidum, & funesta minatur symptomata, nisi mature tollatur continens morbi causa.

## II.

**QUEMADMODUM** Cacochymia, Cachexia; sic Cachexia Leucophlegmatia plerumque soboles; cujus causa proxima, stagnans Lympha, à Sanguinis mora, vel conglobatarum glandularum obstructione, oriunda. Progredienti verò Sanguini moras nectunt ipsius spissitudo, aquea diathesis, paucitas, vasorum ejus compressio, vel tandem à morbo Atonia superstes. Æquo spissior Sanguis, Systolicam Cordis & Arteriarum vim recusans, segniter vibratur; tardi-gradus eructat Lympham, Tegumenta inundantem. Parem Lymphæ exundationem & stagnationem ab aquea Sanguinis diathesi, fibras laxante, expectes. Nec mirum si post Hæmorrhagias aliasque immodicas evacuationes, imminutâ Sanguinis mole, deficiente sufficienti succi nervosi secretionem, languentibus proinde solidis, cruor inertiùs propulsus, suum deponat aqueum laticem, adiposum Corpus jam laxum & à Corde distitum, irrigaturum. Similis contingit effusio lymphæ, à vasorum sanguineorum compressione, ligatura. Compressis ab Utro iliacis gravidarum Venis, enascitur Crurum Œdema; à Vena, vel membro ligato, tumor Œdematosus. Haud quoque rara ab effoetis à morbo viribus, Leucophlegmatia; etenim sub atonia Corporis, fibrarum elaterem remitti; vasorum parietes confidere; Fluida deside procedere passu; Stomachum lassari; alimentorum solutionem depravari; Chylum malè subactum; Sanguini suppeditari, quid frequentius obvium? Nùm hac posite virium defectione, laxatæ Tegumentorum cellulæ torpentibus aquis madeant, necessum habent? Hinc è morbo recreatis, Pedum, Crurum, Manuum, imo & Vultus Œdematosus Tumor familiarissimus. Eundem Tumorem à conglobatarum glandularum obstructione observare est; in his enim organicis partibus impactus obex, præpediâ Lymphæ transmissione, ipsius restagnationi præbet ansam. Quot & quanta ex his memoratis causis futura mala! Diuturniori morâ acrior & vitiosior facta Lympha, teneros vasorum suorum parietes sensim laxando, comminuendo, laniando, effunditur. Hinc Hydatides, abscessus serosi, Ulcera cacoertha, Gangrana, tandem mors. Ocyùs igitur vacuandæ sunt hebetes aquæ, ne corruptelam concipiant.



**R**ESTAGNANTEM in Leucophlegmatia Lympham non unica eliciendi via. Patet frequentior per Diuresin & Catharsin. Nonnunquam per Hydrosin, effusa carcere, sibi pandit iter. Idcirco in spissa Sanguinis diathesi & glandularum infarctu, Aperientia, Diuretica, Hydragoga, Mochlica, Hydrotica exhiberi, vaporisque Balnea & Hypocausta adhiberi solent; his siquidem remediis lenta tenuantur Fluida, referantur glandularum ergastula, per Renes facilius & copiosius secernitur serum; contrectata à Catharticis intestinorum glandula, Lympham fusius effundunt. Sic hauriuntur exundantes aquæ. Verum quantâ morâ; quantis ægotantium cruciatibus, quantâ totius Corporis macie, dubium illud beneficium obtingat, plura testantur exempla! Immo subit metus ne, eliminatâ à solo cruore Lymphâ, magis ac magis inspissetur sanguinea moles, consuetum ideò circuitum tardius absolutura; dum interim madet Corporis peripheria. Quid est ergo cur hisce remediis diutius institeris? Cum faciliora, expeditiora & minus tædiosa præsto sint alia auxilia; leves intellige Scarificationes, quibus cautè adhibitis, brevi cedit aqua intercus.

## I V.

**Q**UO prosperè succedant Scarificationes, hæc potissimum observanda veniunt. 1°. intacti remaneant muscoli; ita ut mali sedes Ferro tantum attingatur. Secus madidiora subirent Ulcera curatu difficiliora. Cuteim igitur ad Corpus adiposum usque Lanceolâ scindere, & in quaque Crurum interna ac externa, Femorumve anteriori parte, duas tresve scarificationes, quatuor transversos circiter digitos longas, instituere sufficit. Totius Corporis ambitus redundans humor, datâ hac eluvie, stillando profluet ex omnibus adiposis cellulis, utpotè sibi invicem communicantibus. 2°. Tempestivè fiant incisiones. Erraret qui ferius ad hoc confugeret præsidium. Diutius in Corpore restitans vel tenuissimum Liquidum, acorem ducit; fibrosum flaccescit Tegumentorum madidius textile; Nervorum extrema spirituoso ac vitali succo orbantur; vulnerata cutis, udiior cicatrici repugnans, manante corripitur Ulcere, sæpissimè Sphacelo. Priusquàm ergo hæc inusta fuerit labes, & simul ac cæterorum remediorum vim eluserit morbus, minimè protelari, quin imò ipsis sociari amant Scarificationes. 3°. Nulla sit in visceribus inveterata obstructio, nullus immedicabilis Scirrhus, nullum Ulcus, nec Scorbutus, Syphylis, Scrophulæ. Haud ab Atonia, Inedia, Hæmorrhagia, vel sub diuturniori ægritudine fatiscat æger. Sic conflictatus, Scarificationibus paulum juvari, non verò sanari potest. 4°. Peractâ operatione, Splenia Aquâ-vitæ camphoratâ, vel alia congruenti madida, fibrarum tonum instaurandi causâ, vulnusculis admoveantur. Effuso latice, citò coalescent.

**Q**UID in Leucophlegmatia fausti sperandum à levibus Scarificationibus, neminem intento rem animo perpendentem fugit? Laxatæ adiposarum cellularum fibræ, exuberantibus undis liberatæ, pristinum elaterem, se se contrahendo, recuperare valent, Vasa omnia amissum tonum resumunt. Instaurantur Systaltici motus. Liquida validius urgentur. Secrétiones & cæteræ functiones redintegrantur. Sic detumescit & firmatur cutis. Id boni contigisse, plus vice simplici observavimus. Si quâ arte, hac potissimum Chirurgiâ agros sanitati reddendos



certum est, Alia nihilominus haud improbamus medicamenta, quæ, quò Natura vergit magis sive, Diuresi, sive Catharsi, vel Diaphoresi, ferocem colluviem eliminandi virtute pollent. Auxiliatrices manus sibi mutuo præstant Pharmacologia & Chirurgia. Hæc ramen tutior est, citior & iucundior. Ex ipsamet afflicta parte immoratur effundit Liquidum, quod nisi per longos, & sæpius impeditos tramites, medicamentorum vel efficacissimis viribus, Secretoria peteret. At iterum monere juvat sedulo cavendum, ne jam flaccidæ partes ac depauperatæ scarificentur; si eas Gangrænæ minus obnoxias fore, velis. Nec altius adactis Ferro faucientur muscoli, quos à putridis Ulceribus arceri satagis. Hæc ne utique timenda veniunt, modò ægrotantibus adhuc consent vires, & ii deploratâ symptomatum sævitate nondum crucientur, nusquamve Corpus adiposum ultrâ pervadant sectiones.

*Ergò Leucophlegmatia, leves Scarificationes.*

## DOMINI DOCTORES DISPUTATURI.

M. Ludovicus Cyprianus DE MONTAIGU, M. Paulus-Gabriel LE PREVUX, M. Simon-Ant. BRINGAUD,  
M. Philippus PETIT-RADEL, M. Lud.-Claudius GUILBERT, M. Claudius-Josephus GENTIL,  
è Societate Medicâ Edimburgensi, antiquus Regis exercituum Medicus ordinarius, Militarium Nosocomiorum ad Regis exercitum Medicus,  
M. Renatus LOUCHE DES-FONTAINES, M. Edmundus-Claud. BOURRU, M. Edm.-Thomas MOREAU,

Proponebat Parisiis ANTONIUS - PETRUS DEMOURS, Parisinus, Regis Christianissimi Medicus Ocularius designatus, nec-non Saluberrimæ Facultatis Medicinæ Parisiensis Baccalaureus.  
A. R. S. H. 1784. AB OCTAVA AD MERIDIEM.



Typis QUILLAU, Universitatis & Facultatis Medicinæ Typographi. 1784.